



Resolución da Dirección Territorial da Consellería do Mar na Coruña pola que se convoca o proceso selectivo para o outorgamento da modalidade de marisqueo con vara no permiso de explotación para embarcacións no marco do Plan de xestión de moluscos bivalvos en zonas de libre marisqueo da Confraría de pescadores de Fisterra

Antecedentes

1. O Plan de xestión de moluscos bivalvos dende embarcación en zonas de libre marisqueo da Confraría de pescadores de Fisterra (PE403A 2023/1-1) (en diante, plan de xestión) aprobouse para o trienio 2024-2026 mediante a Orde do 21 de decembro de 2023 pola que se aproba o Plan Xeral de Explotación Marisqueira.

De conformidade co expediente de aprobación do plan de xestión citado estableceuse un número máximo de quince (15) embarcacións con trinta (30) persoas tripulantes con dereito a cota para todo o trienio.

Na actualidade o número de embarcacións coa arte marisqueo no permiso de explotación incluídas no plan de explotación é de catorce (14) con vinte e oito (28) persoas tripulantes con dereito a cota.

2. O 17.01.2025 (Registro de Entrada N° 2025/100254), a Confraría de pescadores de Fisterra (en diante a entidade) solicitou o outorgamento da arte MARISQUEO no permiso de explotación para unha (1) embarcación con dúas (2) cotas.

3. O 14.02.2024 este departamento territorial comunicou a proposta á Confraría de pescadores de Fisterra para proceder á convocatoria dun proceso selectivo para o outorgamento da arte marisqueo a unha (1) embarcacións con dúas (2) cotas de captura para tripulantes habilitados.

Nesta comunicación outorgábaselles un prazo de tres (3) días para que presentasen as observacións que considerasen oportunas e que de non recibir resposta no prazo sinalado entenderíase como positiva a proposta realizada por este departamento territorial. Transcorrido o dito prazo non consta neste departamento territorial que a entidade realizara ningunha observación.

Consideracións legais e técnicas

1. A Lei 11/2008, do 3 de decembro, de pesca de Galicia, modificada pola Lei 6/2009, do 11 de decembro, e o Decreto 153/2019, do 21 de novembro, polo que se regula o réxime de





conservación e explotación dos recursos marisqueiros e das algas, establecen que o exercicio da actividade de marisqueo de recursos xerais requirirá que:

- Se realice ao abeiro dun plan de xestión ou en zonas de libre marisqueo no marco do Plan xeral de explotación marisqueira establecido
- A extracción de recursos marisqueiros en zonas suxeitas a plan de xestión ou en zonas de libre marisqueo só poderá ser exercida polas persoas e embarcacións que estean en posesión da preceptiva habilitación.

2. O artigo 4º do Decreto 425/1993, do 17 de decembro, polo que se refunde a normativa vixente sobre o permiso de explotación para exercer a actividade pesqueira e marisqueira, entre outros requisitos, establece:

"O permiso de explotación non poderá ser outorgado, revalidado nin transmitido a aquelas persoas físicas ou xurídicas que teñan sanción firme en vía administrativa en materia de protección de recursos mariños, pendente de pagamento."

3. O Decreto 15/2011, do 28 de xaneiro, polo que se regulan as artes, aparellos, útiles, equipamentos e técnicas permitidas para a extracción profesional dos recursos mariños vivos en augas da competencia da Comunidade Autónoma de Galicia, establece:

- En ningún caso, poderán exercer actividades de pesca as embarcacións que non dispoñan de medios mecánicos de propulsión (artigo 6.6).
- As embarcacións que poden optar a incorporar no seu permiso de explotación a modalidade de marisqueo con vara deberán ter menos de 3 TRB ou menos de 2,6 GT (artigo 150).

4. O Decreto 153/2019 do 21 de novembro, polo que se regula o réxime de conservación e explotación dos recursos marisqueiros e das algas, establece no artigo 17.2 que cando o número de participantes sexa inferior ao máximo establecido no plan de xestión, o departamento territorial da consellería competente en materia de marisqueo incrementará anualmente o número de participantes no plan ata o máximo establecido, sen prexuízo das medidas de adaptación establecidas no artigo 21.

5. A disposición adicional terceira da Orde do 21 de decembro de 2023 pola que se aproba o Plan xeral de explotación marisqueira para o trienio 2024-2026 (códigos de procedemento PE403A, PE403C, PE403D e PE403E), establece que en virtude do disposto na disposición adicional terceira da Orde do 26 de outubro de 2004, pola que se regula a alternancia de artes para embarcacións que pesquen en augas da Comunidade Autónoma de Galicia, e durante a vixencia desta orde, naqueles plans de xestión en que os datos resultantes do seguimento da explotación, a situación social do sector e os estudos sobre o estado dos recursos así o permitan, poderase incrementar o número de embarcacións coa modalidade de marisqueo con vara, sen prexuízo das limitacións e condicións establecidas para cada un dos plans de xestión.

O incremento dos/das participantes aprobados/as nos plans de xestión de marisqueo con vara realizarase segundo a resolución da Dirección Xeral de Desenvolvemento Pesqueiro do 22 de outubro de 2013, pola que se aproba o baremo para incrementar o número de cotas nas embarcacións que xa participan nun plan de xestión e para acceder á modalidade de marisqueo con vara no permiso de explotación no marco dun plan de xestión.





6. Así, todas as solicitudes que cumpran os requisitos sinalados nesta resolución serán valoradas de acordo co establecido no anexo I (epígrafes A e C) do baremo aprobado pola Resolución do 22 outubro de 2013, da Dirección Xeral de Desenvolvemento Pesqueiro, pola que se aproba o baremo para incrementar o número de cotas nas embarcacións que xa participan nun plan de xestión e para acceder á modalidade de marisqueo con vara no permiso de explotación no marco dun plan de xestión.

As actividades formativas (cursos, seminarios, xornadas ou asimilados) que se terán en conta para o baremo de acceso á modalidade de marisqueo con vara no permiso de explotación das embarcacións será o *Catálogo de actividades formativas recoñecidas* dispoñible na páxina web <http://www.mar.xunta.gal> (última actualización realizada mediante Resolución ditada pola Dirección Xeral de Desenvolvemento Pesqueiro o 30.09.2024).

7. A Resolución do 22 outubro de 2013, da Dirección Xeral de Desenvolvemento Pesqueiro, desenvolve o mecanismo para o outorgamento da modalidade de marisqueo con vara no permiso de explotación entre as persoas solicitantes asociadas á entidade titular do plan de xestión.

8. Este departamento territorial é o órgano competente de conformidade co establecido no artigo 17.2 do Decreto 153/2019, do 21 de novembro, polo que se regula o réxime de conservación e explotación dos recursos marisqueiros e das algas e co artigo 13 do Decreto 50/2021, do 11 de marzo, polo que se aproba a estrutura orgánica da Consellería do Mar e modificado polo Decreto 149/2024 do 20 de maio.

De acordo con todo o anterior,

RESOLVO:

1. Convocar o proceso selectivo para o outorgamento da modalidade de marisqueo con vara no permiso de explotación para unha (1) embarcación con dúas (2) cotas de captura no marco do plan de xestión de moluscos bivalvos en zonas de libre marisqueo da Confraría de pescadores de Fisterra, con suxeición ás bases da convocatoria recollidas no anexo A e abrir o prazo de presentación solicitudes de participación.

Contra esta resolución, que non pon fin á vía administrativa, poderá interpoñer recurso de alzada ante o conselleiro do Mar no prazo dun (1) mes, que se contará a partir do día seguinte ao da notificación desta resolución, de acordo co establecido nos artigos 121 e seguintes da Lei 39/2015, do 1 de outubro, do Procedemento Administrativo Común das Administracións Públicas (BOE núm. 236, do 2 de outubro de 2015).

Esta resolución notifícaselle á confraría de pescadores de Fisterra, como entidade titular do plan de xestión, consonte ao artigo 40 e seguintes da Lei 39/2015, de 1 de outubro.

A directora territorial
María José Cancelo Baquero





ANEXO A

Bases da convocatoria

1. Normas xerais

1.1. O obxecto do proceso selectivo é o outorgamento da modalidade de marisqueo con vara no permiso de explotación dunha (1) embarcación con dúas (2) cotas de captura no marco do plan de xestión de moluscos bivalvos en zonas de libre marisqueo da Confraría de pescadores de Fisterra.

1.2. Requisitos das embarcacións

Para a obtención da modalidade de marisqueo con vara no permiso de explotación da embarcación, consonte o Decreto 425/1993, do 17 de decembro, o Decreto 15/2011, do 28 de xaneiro, e demais normativa aplicable, deberá cumprirse os seguintes requisitos:

- a) Ter menos de cinco artes ou modalidades no seu permiso de explotación da embarcación. No caso de ter cinco, deberá xustificarse a renuncia a unha delas unha vez seleccionada a embarcación.
- b) Ter menos de 3 TRB ou 2,6 GT
- c) Dispoñer de medios mecánicos de propulsión
- d) Non ter sancións firmes en vía executiva en materia de protección de recursos mariños, pendentes de pagamento.

Ademais, de acordo coa Resolución do 22 de outubro de 2013 da Dirección Xeral de Desenvolvemento Pesqueiro, pola que se aproba o baremo, o outorgamento da modalidade de marisqueo con vara realizárase entre persoas armadoras solicitantes asociadas á entidade titular do plan de xestión.

1.3. Criterios xerais para acceder á modalidade de marisqueo con vara

1.3.1. Terán preferencia á incorporación ao plan de xestión as embarcacións que posúan a modalidade de libre marisqueo no permiso de explotación, sempre e cando a persoa solicitante teña a condición de armador/a da embarcación cun mínimo de 2 anos na data da convocatoria do proceso selectivo.

As prazas cubriranse en función da maior antigüidade da embarcación nun porto base incluído no ámbito territorial da entidade titular do plan de explotación. Tamén se terán en conta as persoas asociadas á entidade armadoras de embarcacións que teñan un porto base fóra do ámbito territorial da confraría, segundo o establecido na disposición transitoria da Orde de 28 de xuño de 2004 pola que se regula a autorización de establecemento e cambio de porto base de buques.

1.3.2. As prazas non cubertas unha vez aplicado o criterio anterior, de ser o caso, distribuiranse entre o resto de embarcacións, é dicir, as que non dispoñan da modalidade de marisqueo con vara no permiso de explotación, as que teñan a modalidade de libre





marisqueo pero sen a antigüidade mínima e as que xa están incluídas nun plan de xestión que ten limitado o número de cotas pero non cumpren os requisitos de preferencia.

1.3.3. Cando o número de solicitudes fose superior ao de prazas, a distribución realizarase en función da puntuación que resulte de aplicar o baremo establecido no apartado C do anexo I da Resolución do 22 outubro de 2013, da Dirección Xeral de Desenvolvemento Pesqueiro, pola que se aproba o baremo para incrementar o número de cotas nas embarcacións que xa participan nun plan de xestión e para acceder á modalidade de marisqueo con vara no permiso de explotación no marco dun plan de xestión.

1.3.4. Nos plans de xestión nos que as embarcacións teñan asignadas un número determinado de cotas de captura, o número de prazas outorgarase con carácter xeral, en función das persoas que teñan enroladas as embarcacións seleccionadas, sen poder superar o número máximo de prazas autorizadas.

1.3.5. O outorgamento de prazas quedará limitado ao máximo de tripulantes autorizados pola administración marítima.

1.3.6. No caso de que a embarcación sexa explotada por una sociedade civil ou mercantil, ou conxuntamente por varios/as armadores/as, só poderán acreditarse os méritos dunha persoa, que será a mesma para todos os apartados do baremo.

1.3.7. No se puntuarán os méritos de formación e experiencia profesional cando a persoa ou algunha das persoas solicitantes sexan armadoras de outras embarcacións que xa posúan as modalidades de marisqueo con vara ou de recursos específicos no permiso de explotación.

1.4. Solicitudes, documentación, prazo e lugar de presentación

A Lei 4/2019 do 17 de xullo, de administración dixital de Galicia (DOG núm. 141, do 26 de xullo de 2019) no seu artigo 10º 1.a) establece que os traballadores autónomos e as traballadoras autónomas, para os trámites e as actuacións que realicen no exercicio da súa actividade profesional, no ámbito do sector público autonómico, estarán obrigados a relacionarse a través dos medios electrónicos para a realización de calquera trámite dun procedemento administrativo, ademais do indicado no artigo 14.2 da Lei 39/2015, do 1 de outubro, do procedemento administrativo común das administracións públicas.

As persoas que desexen participar no proceso selectivo deberán presentar por vía electrónica unha solicitude dirixida ó Departamento Territorial da Coruña da Consellería do Mar, mediante o procedemento PR004A -Presentación electrónica de solicitudes, escritos e comunicacións que non contén cun sistema electrónico específico nin cun modelo electrónico normalizado- dispoñible na sede electrónica da Xunta de Galicia (<https://sede.xunta.es>).

O prazo para a presentación das solicitudes será de quince (15) días hábiles, contados desde o día seguinte ao da publicación desta convocatoria no taboleiro de anuncios deste departamento territorial e na páxina web <http://www.mar.xunta.gal>.

Esta convocatoria tamén estará exposta, con carácter informativo, no taboleiro de anuncios da confraría de pescadores de Fisterra.

A falsidade dos datos esenciais para a selección das persoas aspirantes dará lugar á súa exclusión automática do proceso selectivo.





A solicitude, asinada pola/s persoa/s titular/es do permiso de explotación, deberá vir acompañada da seguinte documentación:

1.4.1. Documentación mínima para a admisión da solicitude

a) Para acreditar a personalidade na presentación da solicitude:

a.1) No caso dunha persoa física, copia do DNI ou NIE da persoa solicitante, en caso de non autorizar á Consellería do Mar para a obtención desta información.

a.2.) No caso de co-titularidade, copia do DNI ou NIE do resto das persoas físicas titulares do permiso de explotación da embarcación, agás no suposto de autorización expresa á Consellería do Mar para obter esta información. A autorización expresa para a consulta destes datos realizarase empregando o anexo IX da Orde do 30 de decembro de 2015.

a.3) No caso dunha persoa xurídica, copia do NIF da entidade e copia do DNI ou NIE da persoa representante en caso de non autorizar á Consellería do Mar para obter esta información. No caso dunha persoa xurídica, a persoa representante deberá acreditar a representación con que actúa.

No caso de ser titular do permiso de explotación por cesión, deberán tamén dar a súa conformidade a/s persoa/s propietaria/s da embarcación e acreditar a personalidade seguindo os puntos anteriores.

b) Xustificante de ter aboado o pagamento da taxa correspondente ao código 30.17.01: "Expedición ou duplicado de permisos de explotación dende embarcación, segundo tonelaxe de rexistro bruto (novo permiso, renovación, traslado e transmisión, ampliación ou cambio de artes, para toda actividade pesqueira e marisqueira exercida desde embarcación)". Non será necesario presentar este documento se o pago da taxa se realizou de forma telemática.

1.4.2 Outra documentación:

a) Folla de asento da embarcación actualizada á data da convocatoria ou copia dixitalizada do documento orixinal.

b) Documentación acreditativa de cada un dos aspectos que se van a valorar de acordo ao baremo aprobado pola Resolución do 22 de outubro de 2013, da Dirección Xeral de Desenvolvemento Pesqueiro.

Para os efectos de computar os méritos establecidos só se valorarán os obtidos ata a data de publicación da resolución da apertura do prazo de presentación de solicitudes. Así:

b.1) Número de artes ou modalidades incluídas no permiso de explotación

A información relativa a este epígrafe será a que conste en poder da Consellería do Mar.

b.2) Vendas en lonxa ou centro de venda autorizado da embarcación





Para a valoración deste epígrafe, a persoa solicitante deberá presentar certificación da capitánía marítima que recolla os seguintes aspectos nos dous anos naturais anteriores á data da convocatoria (2023 e 2024):

- despachos da embarcación.
- tripulación enrolada na embarcación con nome e apelidos e períodos de embarque.

Descontaranse os períodos de tempo en que a embarcación estivo inactiva por causa de forza maior (deberase achegar a xustificación documental que así o acredite) e cando as persoas solicitantes non fosen armadores da embarcación (segundo o permiso de explotación).

A información relativa ás vendas en lonxa ou centros de venda autorizado será a que conste en poder da Consellería do Mar.

b.3) Período de actividade da embarcación (registro da actividade pesqueira)

Non se terá en conta o período de tempo no que as persoas solicitantes non fosen armadores/as da embarcación.

A información respecto ao registro da actividade pesqueira será a que conste en poder da Consellería do Mar.

b.4) Antigüidade da embarcación nun porto base incluído no ámbito territorial da entidade titular do plan de xestión

A información respecto ao registro da actividade pesqueira será a que conste en poder da Consellería do Mar.

b.5) Número de embarcacións da persoa armadora

A información respecto a este epígrafe será a que conste en poder da Consellería do Mar.

b.6) Formación da persoa armadora da embarcación

i) Actividades de formación: documentación acreditativa das actividades formativas recoñecidas como mérito para acceder á modalidade de marisqueo con vara e que figuran inscritas no catálogo de actividades aprobado pola Resolución da Dirección Xeral de Desenvolvemento Pesqueiro (dispoñible na páxina web (<http://www.mar.xunta.gal>) na data da convocatoria. Unicamente se valorarán as actividades formativas finalizadas na data de publicación da convocatoria.

Non se computarán aqueles cursos ou títulos profesionais necesarios para o exercicio da actividade: mariñeiro-pescador, formación básica, certificado de mariscador/a, certificado de percebeiro/a, certificado para a extracción de recursos específicos con técnicas de mergullo.

Cando unha actividade formativa teña varios niveis, só computará aquela que permita acadar a maior puntuación.





ii) **Titulación académica:** documentación que acredite estar en posesión da titulación académica correspondente. Só se valorará a titulación académica superior.

Ademais, engadirase 1 punto á valoración obtida na titulación académica cando a persoa solicitante posúa algunha titulación profesional regulada de acuicultura ou náutico-pesqueira, así como formación non regulada, de Patrón de pesca local, Patrón costeiro polivalente e Capitán de pesca.

b.7) Experiencia profesional no sector da persoa armadora da embarcación

No caso de que a persoa solicitante, titular do permiso de explotación da embarcación, estivese enrolada nunha embarcación incluída nun plan de xestión de marisqueo con vara nos 2 anos anteriores á data da convocatoria, deberá presentar unha certificación da capitanía marítima dos enroles desta persoa nos dous anos anteriores á data da convocatoria.

Non computará o período de tempo no que a persoa armadora estivese en situación de incapacidade temporal.

c) **Documentación que acredite o número máximo de tripulantes autorizados de acordo coas características da embarcación (certificado de conformidade).**

1.5. Emenda da solicitude

O departamento territorial, como órgano responsable da tramitación e resolución das solicitudes, comprobará que estas reúnen os requisitos establecidos. De non ser así, requiriráselle á persoa interesada, para que nun prazo de dez (10) días hábiles a emende, con indicación de que se así non o fixese se lle terá por desistida da súa petición logo de resolución expresa.

A notificación das emendas das solicitudes realizarase de conformidade co establecido nos artigos 42, 43 e 45 da Lei 39/2015, do 1 de outubro, mediante publicación no taboleiro de anuncios do departamento territorial e na páxina web <http://www.mar.xunta.gal>, e producirá os mesmos efectos que a notificación individualizada.

Esta publicación tamén se realizará, con carácter informativo, no taboleiro de anuncios da Confraría de pescadores de Fisterra.

A documentación requirida para a emenda da solicitude deberá ser presentada por calquera dos medios establecidos no artigo 16 da Lei 39/2015, do 1 de outubro.

2. Proceso selectivo. Relación provisional e definitiva

2.1. O departamento territorial procederá, no seu caso, á baremación das solicitudes e publicará, no taboleiro de anuncios do departamento territorial e na páxina web <http://www.mar.xunta.gal>, unha relación provisional indicando a puntuación acadada por cada unha das embarcacións aspirantes e persoas armadoras. Así mesmo, nesta relación recolleranse as embarcacións e persoas excluídas do proceso e as causas de dita exclusión.

A resolución tamén se exporá, con carácter informativo, no taboleiro de anuncios da confraría de pescadores de Fisterra.





O feito de figurar na relación de persoas e embarcacións admitidas non prexulga que se lle recoñeza á persoa interesada ou embarcación a posesión dos requisitos esixidos no procedemento regulado nesta sección. Cando da documentación que deba presentarse no caso de ser seleccionado, se desprenda que non posúa algúns dos requisitos, a persoa interesada decaerá de todos os dereitos que podan derivar da súa participación no procedemento.

Contra a relación provisional de puntuacións, as persoas interesadas poderán presentar ante o departamento territorial cantas alegacións consideren oportunas no prazo máximo de quince (15) días hábiles, contados desde o día seguinte ao da súa publicación no taboleiro de anuncios do departamento territorial e na páxina web <http://www.mar.xunta.gal>.

As embarcacións e persoas excluídas poderán presentar contra esta resolución, que non pon fin á vía administrativa, un recurso de alzada ante o conselleiro do Mar no prazo dun (1) mes contado a partir do día seguinte ao da publicación desta resolución, de acordo co establecido nos artigos 30, 121 e 122 da Lei 39/2015 de 1 de outubro, do Procedemento Administrativo Común das Administracións Públicas.

2.2. Unha vez finalizado o prazo de presentación de alegacións e analizadas estas, o departamento territorial ditará a resolución coa relación definitiva das embarcacións seleccionadas e persoas armadoras, así como das non seleccionadas. A dita resolución será exposta nos lugares e cos mesmos efectos que os previstos no punto 2.1.

As alegacións non se contestarán expresamente de xeito individualizado, aínda que, de ser o caso, si se terán en conta para a puntuación definitiva.

En caso de empate na puntuación obtida tras aplicar o baremo, terán preferencia, en primeiro lugar, as embarcacións cuxas persoas armadoras sexan mulleres, e en segundo lugar, as persoas armadoras de menor idade. De persistir o empate, resolverase por sorteo público.

Contra a resolución que aprobe a relación definitiva, que non esgota a vía administrativa, a persoa interesada poderá interpoñer recurso de alzada no prazo dun mes, contado desde o día seguinte ao da súa publicación no taboleiro de anuncios do departamento territorial e na páxina web <http://www.mar.xunta.gal>, ante a persoa titular da Consellería do Mar, de conformidade co establecido nos artigos 121 e 122 da Lei 39/2015, do 1 de outubro.

3. Asignación da modalidade

A/s persoa/s armadora/s da embarcación seleccionada deberán presentar, no prazo máximo de quince (15) días hábiles contados desde o día seguinte ao da publicación da relación definitiva, a seguinte documentación para o outorgamento da arte e a asignación final das cotas á embarcación:

- Rol de despachos actualizado da embarcación coa dotación de tripulación enrolada nela





Se a documentación non se presenta no prazo establecido, entenderase que desisten da súa solicitude, de conformidade co disposto no artigo 68 da Lei 39/2015, do 1 de outubro, polo que procederase a asignar a modalidade e a cota obxecto desta convocatoria á seguinte embarcación de acordo coa puntuación obtida trala aplicación do baremo.

Ademais, de acordo co disposto no Decreto 425/1993, do 17 de decembro, Orde do 26 de outubro de 2004 pola que se regula a alternancia de artes para embarcacións que faenen en augas da Comunidade Autónoma de Galicia, e a Resolución do 22 outubro de 2013, da Dirección Xeral de Desenvolvemento Pesqueiro, pola que se aproba o baremo para incrementar o número de cotas nas embarcacións que xa participan nun plan de xestión e para acceder á modalidade de marisqueo con vara no permiso de explotación no marco dun plan de xestión, a/s persoa/s armadora/s da embarcación seleccionada que presentasen a documentación dentro do prazo establecido deberán cumprir cos seguintes requisitos para a obtención da modalidade no permiso de explotación e das cotas asignadas:

- No caso de embarcacións que posúan cinco (5) artes ou modalidades no seu permiso de explotación, a renuncia a algunha delas.
- Non ter sancións firmes en vía executiva en materia de protección de recursos mariños, pendentes de pagamento.
- As persoas armadoras solicitantes deberán estar asociadas á entidade titular do plan de xestión. No caso dun plan de xestión conxunto estarase ao disposto no plan aprobado en canto á distribución de prazas entre entidades, de ser o caso. Para o cumprimento deste requisito presentarse unha certificación da confraría de pescadores titular do plan de xestión. Non será necesario en caso de autorización á Consellería do Mar para a súa consulta.

O departamento territorial ditará resolución concedendo ou denegando a modalidade de marisqueo con vara, conforme ao establecido na Resolución do 22 de outubro de 2013.

